

KERATAN AKHBAR

TARIKH : 28 JULAI 2023
AKHBAR : BERITA HARIAN
MUKA SURAT : 2

2 tumpuan utama struktur ekonomi



EKONOMI MADANI
Memperkasakan Rakyat

2 tumpuan utama struktur ekonomi

Pelbagai inisiatif dilaksana angkat semula darjat, martabat negara

Oleh Hazwan Faisal Mohamad dan Ahmad Suhael Adnan
bhnews@bh.com.my

Kuala Lumpur: Datuk Seri Anwar Ibrahim semalam melancarkan Ekonomi MADANI: Memperkasakan Rakyat sebagai kerangka ekonomi baharu Malaysia bertujuan untuk mengangkat semula darjat dan martabat negara.

Perdana Menteri berkata, kerangka itu akan menstruktur semula ekonomi ke arah menjadikan Malaysia sebagai peneraju ekonomi Asia, dan memberi limpahan hasil kepada rakyat untuk menikmati kehidupan yang lebih berkualiti.

Oleh itu, Anwar berkata - Ekonomi MADANI: Memperkasakan Rakyat, adalah perihai mengangkat semula darjat dan martabat negara ini dengan dua tumpuan utama iaitu menstruktur semula ekonomi ke arah Malaysia sebagai peneraju ekonomi Asia, dan memberi limpahan hasil kepada rakyat untuk menikmati kehidupan yang lebih berkualiti.

"Ini adalah sebuah rencana menyeluruh dan teliti bagi menghadapi pelbagai tantangan saat ini mencakupi isu jangka panjang terkait daya saing dan daya tarikan negara sebagai destinasi pelaburan.

"Juga membabitkan isu semasa yang perlu segera ditangani seperti kenaikan kos sara hidup yang mengesankan rakyat," katanya berucap pada Pelancaran Ekonomi MADANI: Memperkasakan Rakyat di sini, semalam.

Perkemas secara teliti

Anwar yang juga Menteri Kewangan berkata, perkongsian mengenai Ekonomi MADANI telah ditelusuri bersama pakar ekonomi, perancang dan penjawat awam.

Katanya, kerangka kebijakan itu diperkemas selepas mendapat pandangan pekerja, petani, golongan wanita, peneroka dan belia dalam siri wacana berterusan sekali gus menjadikan pertemuan di masjid, warung dan universiti cukup mengesankan.

"Ikhtiar yang ingin diperkenalkan ini adalah perancangan ba-

haru membabitkan pelbagai sektor dari aspek ekonomi. Perancangan ini meliputi langkah ke arah peningkatan pemacu ekonomi, menggalakkan pelaburan dan memperkukuh industri tempatan supaya lebih inovatif dan berdaya saing serta mampu dilongkangi ke pasaran global.

"Ekonomi rakyat menjurus kepada setiap golongan masyarakat daripada pedagang dan pengusaha kepada penjawat awam dan golongan profesional, pekerja serta rakyat miskin bandar, desa dan pedalaman.

"Usaha kerajaan juga adalah untuk menyediakan bantuan serta dukungan kepada yang memerlukan supaya semua mampu mengecap nikmat pembangunan ekonomi negara secara saksama," katanya.

Ekonomi MADANI menetapkan tujuh penanda aras sebagai sasaran jangka sederhana yang mahu dicapai dalam tempoh 10 tahun.

Tujuh penanda aras itu adalah Malaysia berada di kedudukan 30 ekonomi terbesar di dunia; Indeks Daya Saing Global di tangga ke-12 teratas dunia; peratusan pendapatan buruh mencapai 45 peratus daripada jumlah keseluruhan pendapatan; kadar penyertaan wanita dalam tenaga buruh mencapai 60 peratus.

Indeks Pembangunan Manusia di tangga 25 teratas dunia; Indeks Persepsi Rasuah di tangga 25 teratas dunia dan kemampuan fiskal dengan defisit fiskal mencapai tiga peratus atau lebih rendah.

2000
220% ↑

% Perdagangan kepada

Perdana Menteri berucap pada Majlis Peluncuran Ekonomi MADANI: Memperkasakan Rakyat di Kuala Lumpur, semalam. (Foto Alzuddin Saad/BH)